



Taarifa kwa vyombo vya habari
10 Aprili 2017

Takwimu mpya za Uwezo zinaonesha mwenendo mzuri katika somo la Kiswahili Hata hivyo, matabaka yameendelea kujitokeza nchini kote. Kuna tofauti ya asilimia 60 kati ya wilaya zinazofanya vizuri na zisizofanya vizuri

10 Aprili 2017, Dodoma: Miongoni mwa watoto wenye umri wa miaka 9 hadi 13, wengi wao hawawezi kufanya majaribio ya kiwango cha darasa la 2. Pia kuna tofauti kubwa sana kiwilaya. Iringa Mjini, wilaya iliyofanya vizuri, asilimia 74 ya watoto wenye miaka 9 hadi 13 walifaulu majaribio ya kusoma Kiswahili na Kiingereza na kufanya hesabu. Kwa upande wa wilaya ya Sikonge, ni asilimia 15 pekee waliofaulu. Kimkoa, asilimia 64 ya watoto katika mkoa wa Dar es Salaam wenye miaka 9 hadi 13 walifaulu majaribio yote matatu, lakini katika mkoa wa Katavi asilimia 23 pekee ya watoto wenye umri kama huo ndio waliofaulu.

Vilevile, asilimia 42 kutoka kaya masikini walifaulu majaribio yote matatu ukilinganisha na asilimia 58 kutoka kaya tajiri. Tofauti hizi zinaonesha kuwa mahali anapoishi mwanafunzi panachangia kwa kiwango kikubwa matokeo ya kujifunza kuliko hali ya kiuchumi na vitu vingine ambavyo hudhaniwa kuhusika katika kuleta mafanikio kielimu.

Mkurugenzi Mtendaji wa Twaweza, Aidan Eyakuze, anasema *“inatia moyo kuona watoto wetu wanapata matokeo mazuri zaidi kuliko miaka ya nyuma kwenye somo la Kiswahili, lakini safari bado ni ndefu. Kitu cha kutia shaka ni ongezeko la kukosekana kwa usawa kwenye matokeo ya kujifunza kutokana na maeneo wanayoishi watoto. Takwimu zetu zinaonesha kuwa mahali anapoishi mtoto huchangia kwa kiwango kikubwa uwezo wake wa kujifunza, kuliko sababu zinginezo kama vile elimu ya mama yake, kupata ama kutokupata elimu ya awali au kuwa na udumavu ama la.”*

Matokeo haya yametolewa na Uwezo Tanzania iliyopo Twaweza katika ripoti iitwayo **Je, Watoto Wetu Wanajifunza? Ripoti ya Sita ya Mwaka ya Upimaji wa Kujifunza**. Ripoti hii inatokana na takwimu zilizokusanywa na Uwezo Tanzania ambayo ni sehemu ya tathmini kubwa barani Afrika inayopima matokeo ya kujifunza ikiongozwa na wananchi. Tathmini hii pia inatekelezwa nchini Kenya na Uganda. Katika awamu ya sita ya ukusanyaji wa takwimu uliofanywa na Uwezo Tanzania mwaka 2015, jumla ya watoto 197,451 walifanyiwa tathmini kutoka kaya 68,588. Takwimu hizo zilikusanywa kutoka shule za msingi 4,750.

Kwa ujumla matokeo ya kujifunza hayajafikia kwango stahili ukilinganisha na matarajio ya mitaala katika masomo yote matatu. Miongoni mwa wanafunzi wa darasa la 3 na la 7:

	Darasa la 3	Darasa la 7
Wanaoweza kusoma hadithi ya Kiswahili:	56%	89%
Wanaoweza kusoma hadithi ya Kiingereza:	13%	48%
Wanaoweza kufanya hesabu za Kuzidisha:	35%	78%

Hata hivyo yapo matokeo chanya: kati ya mwaka 2011 na 2015 viwango vya ufaulu katika somo la Kiswahili vimeongezeka karibu mara mbili kutoka asilimia 29 hadi asilimia 56 (kwa wanafunzi wa darasa la 3). Kwa darasa la 7, kiwango cha ufaulu kimeongezeka kutoka asilimia 76 hadi asilimia 89 katika kipindi hicho hicho.

Japokuwa bado inaonesha kuwa wanafunzi wengi hasa walio katika madarasa ya chini wapo nyuma ya matarajio ya mitaala, lakini hii inatupa matumaini. Kuna dalili kuwa jitihadi za pamoja za serikali, ikiwemo

misaada kutoka kwa wahisani wa maendeleo, za kujikita kwenye kuboresha stadi za msingi katika madarasa ya mwanzo kupitia programu mbalimbali, zinaanza kuzaa matunda.

Vilevile uwiano kati ya wanafunzi na vitabu umeboreka kutoka wanafunzi 30 kutumia kitabu kimoja mwaka 2013 hadi wanafunzi 8 mwaka 2014, mpaka kufikia wanafunzi 3 wanaotumia kitabu kimoja mwaka 2015. Takwimu hizi zinaonesha kiwango cha mabadiliko kinachoweza kufikiwa na hatua imara zinazosimamiwa vizuri.

Kwa upande mwingine, ripoti hii ya Uwezo inaonesha kushuka kwa kiwango cha uandikishwaji wa watoto, hususani vijijini. Mwaka 2011, asilimia 77 ya watoto wenye umri wa miaka 7 waliandikishwa shule ya msingi ukilinganisha na asilimia 55 mwaka 2015. Kwa kuangalia uandikishwaji wa watoto wenye umri kama huo kwenye taasisi yoyote inayotoa elimu (ikiwemo shule za awali), takwimu zimeshuka kutoka asilimia 86 mwaka 2011 hadi 81% mwaka 2015. Uchambuzi wa kina unaonesha kuwa ushukaji huo unajitokeza zaidi kwenye maeneo ya vijijini: uandikishwaji wa watoto wenye miaka 7 kwenye taasisi yoyote inayotoa elimu (ikiwemo shule za awali) umeshuka kutoka asilimia 84 mwaka 2011 hadi asilimia 78 mwaka 2015. Kwenye maeneo ya mijini uandikishwaji umeshuka kutoka asilimia 94 (2011) mpaka asilimia 93 (2015). Vilevile, viwango vya uandikishwaji vijijini vinaonekana kushuka miongoni mwa rika zote wakati kwenye maeneo ya mijini umeendelea kuimarika.

Kwa ujumla mwalimu mmoja kati ya wanne (asilimia 25) na karibu wanafunzi watatu kati ya kumi (asilimia 29) hawakuwepo shuleni siku ya tathmini. Hii inaathiri muda wa wanafunzi na mwalimu kukutana na hivyo kupunguza muda wa kufundisha na kujifunza.

Zaida Mgalla, Meneja wa Uwezo Tanzania, alisema *“Tunaipongeza serikali kwa jitihada zake za kuhakikisha watoto wanapiga hatua katika somo la Kiswahili pamoja na kuhakikisha watoto wengi wanapata vitabu. Takwimu hizi zinaonesha kuwa mabadiliko yanawezekana. Lakini hatupaswi kuridhika. Kushuka kwa viwango vya uandikishaji watoto shuleni unaweza kuonesha dalili za kuanza kupotea kwa morali ya awali juu ya utoaji wa elimu ya msingi bure uliosababisha uandikishaji mkubwa. Changamoto inayotukabili sote ni kuhakikisha tunapiga hatua katika kuelekea ubora unaokusudiwa katika Sera yetu ya Elimu. Na tunaweza kufanya hivyo kwa kukagua madaftari na kazi za shule za watoto wetu kila siku, kwa kufuatilia kwa karibu namna shule zetu zinavyoendeshwa, na kwa kujikita zaidi katika kuboresha matokeo ya kujifunza katika shule zetu.”*

----Mwisho----

Kwa taarifa zaidi wasiliana na:

Risha Chande

Mshauri Mwandamizi wa Mawasiliano, Twaweza

Barua pepe: rchande@twaweza.org | **Simu:** (+255) (0) 656 657 559

Ujumbe kwa wahariri

- Muhtasari huu na takwimu zilizomo vinaweza kupatikana kwenye www.twaweza.org, au www.uwezo.net
- Twaweza inafanya kazi kuwezesha watoto kujifunza, wananchi kuwa na utayari wa kuleta mabadiliko na serikali kuwa wazi zaidi na sikivu katika nchi za Tanzania, Kenya na Uganda. Tuna programu, wafanyakazi na ofisi katika nchi zote tatu, na utaratibu unaoheshimika kimataifa wa kujifunza, ufuatiliaji na tathmini. Programu zetu muhimu ni pamoja na *Uwezo*, tathmini kubwa ya kila mwaka ya wananchi barani Afrika inayopima viwango vya watoto vya kujifunza kwenye maelfu ya kaya, na *Sauti za Wananchi*, utafiti wa kwanza Afrika wenye uwakilishi wa kitaifa unaofanyika kwa njia ya simu ya mkononi. Pia tunashiriki kwenye masuala ya umma na sera, kupitia ubia wetu na vyombo vya habari, juhudi za kimataifa zinazoshughulikia masuala ya uongozi kama vile mpango wa Ushirikiano na Serikali wazi (OGP).
- Unaweza kufuatilia kazi za Twaweza

Tovuti: www.twaweza.org **Facebook:** Twaweza Tanzania **Twitter:** @Twaweza_NiSisi